

Allannguutissatut siunnersuut

uunga

Uunga siunnersuut: Nappaatit tunillaassortut akiorniarlugit iliuitsit pillugit Inatsisartut inatsisaat

Aappassaaneerinninnermut Ilaqutariinnermut Peqqissutsimullu Ataatsimiititaliamut saqqummiunneqartoq.

Kapitali 12-imut

1. Kapitali 12 ima oqaasertaqassaaq:

” Kapitali 12

Atuutilersitsinermut atuukkunnaarsitsinermullu aalajangersakkat

§ 57. Inatsisartut inatsisaat ulloq 1. juli 2022 atuutilissaaq.

Imm. 2. Inatsisartut inatsisaat ulloq 1. juli 2023 atuukkunnaarsinneqassaaq.”

Siunnersuummut nassuiaatit

Nalinginnaasumik nassuiaatit

Inatsisartut Siulittaasoqarfiata 2021-mi januaarimi Naalakkersuisunut kaammattuutigaa nappaatit tunillaassoortut pillugit inatsimmi inatsit malillugu killiliilluni iliuitsinik inatsisartutigoortumik nakkutilliisinnaanermut najoqqutassanik nappaatit tunillaassortut pillugit inatsimmi ilanngussisoqarnissaanut suliniuteqaqqullugit. Tamatumunnga atatillugu Siulittaasoqarfiup oqaatigaa Covid-19 eqqarsaatigalugu pissutsinut tunngatillugu aalangiisarnerit innuttaasunut suliffeqarfinnullu annertuumik akulerunnerummata, soorlu aamma aalajangiinissamut tunngavigisanut kingunerisassanullu tunngatillugu erseqqissunik paasinartunillu aalajangiisoqartarnissaata pisariaqassusia Siulittaasoqarfiup uparuaraa. Tamatuma saniatigut Siulittaasoqarfiup innersuussutigaa taamanikkut nappaatit tunillaassortut pillugit inatsisissatut siunnersuut nutaaq Danmarkimi suliarineqaleruttormat ilaatigut nappaatit tunillaassortut pillugit inatsit malillugu akulerunnerit inatsisartutigoortumik nakkutigineqarsinnaanerisa qularnaarneqarnissaat siunertaralugu.

Inatsisissatulli siunnersuut Naalakkersuisunit saqqummiunneqartoq aalajangersakkanik imaqaanngilaq nappaatit tunillaassortut pillugit inatsit malillugu iliuitsinik inatsisartutigoortumik nakkutiliisinnaanissamik qularnaarinnittunik.

Tamatumunnga tunngaviusut qulaajarneqarnissaannut Naalakkersuisut Ilaqutariinnermut Peqqissutsimullu Ataatsimiititaliamut akissummi paasissutissiissutigisimavaat inatsisartutigoortumik nakkutilliisinnaanermut aalajangersakkanik Danmarkimi nappaatit tunillaassortut pillugit inatsimmi atuuttumi aalajangersakkanut naapertuuttunik ilanngussinissaq isumaqaanngitsoq tamanna tamatigut pissusissamisuuassasoq, tassamigoq Kalaallit Nunaanni Danmarkimilu naalakkersuinikkut aqutseriaatsit assigiinngimmata. Naalakkersuisut taamaattumik tamatuma ulluinnarni sulinermit inatsisilerinikkullu kingunerisassaasa tamakkiisumik qulaajarneqarnissaat kissaatigaat Danmarkimi inatsimmut naapertuuttumik inatsisartutigoortumik nakkutilleeriaatsimut naapertuuttumik nappaatit tunillaassortut inatsisip allanngortinneqarnissaanik siunnersuuteqaannginnermi.

Ilaqutariinnermut Peqqissutsimullu Ataatsimiititaliap suliniutit tamakku siumut ingerlanissaat ikorfartorniarlugu kissaatiginartissimavaa siunnersuummi saqqummiunneqartumi atorunnaarsitsinissamut piumasaqaammik aalajangersaasoqassasoq Inatsisartut inatsisaata ulloq 1. juli 2023 atuukkunnarsinneqarnissaanik malitseqartussamik.

Taamaalillugu naatsorsuutigineqarpoq Naalakkersuisut nappaatit tunillaassortut akiorniarlugit iliuitsit pillugit Inatsisartut inatsisissaannik nutaamik kingusinnerpaamik 2023-mi upernaakkut ataatsimiinnermut saqqummiussissasut, inatsisissatullu siunnersuut taanna aalajangersakkanik imaqaassasoq Inatsisartut inatsisaat tunngavigalugu iliusaasinnaasut – annertuumik akulerunnerusinnaasut – inatsisartutigoortumik nakkutigineqarsinnaanerinik qularnaarittumik.

Inatsisissatut siunnersuummut tunngatillugu Ilaqutariinnermut Peqqissutsimullu Ataatsimiititaliap isumaliutissiissutaa allatigut innersuussutigineqarpoq.

Allannguutissatut siunnersuummi aalajangersakkanut ataasiakkaat nassuiaatit

Nr. 1-imut

Allannguutissatut siunnersuutip malitsigisaanik Inatsisartut inatsisaat ulloq 1. Juli 2023 atuukkunnaarsinneqassaaq.